

**INATSIARTUT
OMBUDSMANDIATA
UKIUMOORTUMIK
NALUNAARUTAA
1997**

4. Suliniutit suliallu nammineerluni misissugassanngortitat

Ombudsmandi pillugu inatsimmi § 6, imm. 5, naapertorlugu suliassanik nammineerlunga misissugassanngortitsisinnaatitaavunga.

Periarfissaq taanna 1997-imi sulianni matuma ataani taagorneqartuni ator-simavara.

Suliaq ataasiinnaq, Atorfeqarfup 1996-imi misissugassanngortissimasaa, ukiup nalunaarusiuunneqartup naanerani suli inaarneqarsimangilaq, suliamilu killiffiusoq immikkoortumi matumani naatsumik nassuiaateqarfigaara.

Suliat nammineerluni misissugassanngortitat 1997-imi inaarsimasakka nalunaarummi matumani immikkoortumi tulluuttumi eqqartorneqartup.

4-1 Ataatsimut sillimmasiinnermut akiliutinik akileeqqusissutinut akerliliissutinik kommunip suliagarnera.

Sulisilluni Ajoqusersinnaanermut Sillimmasiisarneq pillugu Ataatsimii-titaliami ataatsimut sillimmasiinnermut akiliutinik akileeqqusinerni kinguar-tooruteqarnerit pillugit naammagittaalluut Ombudsmandip maannakkor-piaq suliarivaa.

1997-imi kommunimut tikeraarsimatillunga kommunimi atorfilittamit ilisimatinneqarpunga aammattaaq kommunimi taassumani akileeqquseri-aaseqarneq ajornartorsiuteqarfusimasoq.

Tamanna pillugu kommunip sulianni allagaataasa assilinerinik misissu-gassanngortitanik tigusaqarpunga.

Tamanna tunuliaqutaralugu aalajangerpunga kommunimi ataatsimut sil-limmasiinnermut akiliutinik akileeqqusinernut akerliliissutinik, ombuds-mandi pillugu inatsisip 1995-imi aprilip aallaqqaataani atuutilernerata ki-ngorna tiguneqarsimasunik, Namminersornerullutik Oqartussat suliagarne-rat nammineerlunga misissuiffigilerniarlugu.

4-2 Inuussutissarsiutinut taarsigassarsisitsinerni utertitsillunilu akiliisus-sanngortitsinikkut pisortat ikiorsiissutaannik tunniussinerni allaffissiat im-mersugassat assigiiaartut.

1997-imi kommunimut tikeraarnermut atasumik malugisimavara kom-munip arlaleriarluni inuussutissarsiutinut taarsigassarsisitsinerni utertitsil-lunilu akiliisussanngortitsinikkut pisortat ikiorsiissutaannik kommunip tunniussinerini, allaffissiaq immersugassaq assigiissagaq “Taarsigassarsi-sitsinissamik neriorsuut”, atortaraa taarsigassarsinnermut atasumik atugas-sarititaasunik imaattunik imalik:

“Taarsigassarsinermi periaatsit nalinginnaasut: Taarsersornissaannut periusissaq qulaani pineqartoq malinneqarsinnaanngippat taarsigassarsisitsisup taarsigassarsi-soq nalunaarfīgissavaa taarsigassarsisup aningaasarsiasai suulluunniit allanngortin-neqarsinnaanngitsumik taarsigassarsisitsisup nammineerluni ilanngaaffigittissinnaa-gai – soorlu akissarsiasai, tunisinnermi aningaasarsiat allallu.

Akiligassaqarfik pisinnaatinneqarpoq sulisitsisunut tunisiffinnuunniit aningaasarsianik ilanngaasisinnaanermik nalunaaruteqassalluni.”

Tamanna tunuliaqutaralugu aalajangersimavunga taarsigassarsinermi atugassarititaasunik issuarneqartunik atuineq pillugu nammineerlunga missisugassanngortitsiniarlunga.
